

Na osnovu člana 158. Zakona o zaštiti prirode („Službene novine Federacije BiH“, broj: 66/13), člana 22. stav (1) Zakona o proglašenju dijela područja planine Konjuh Zaštićenim pejzažom „Konjuh“ („Službene novine TK“, broj: 13/09, 8/14 i 13/17), te člana 26. i 34. Pravila JU Zaštićeni pejzaž „Konjuh“, a u skladu sa Planom upravljanja Zaštićenim pejzažom „Konjuh“, Upravni odbor JU Zaštićeni pejzaž „Konjuh“, uz saglasnost Ministarstva prostornog uređenja i zaštite okolice Tuzlanskog kantona, na 25 sjednici, održanoj dana 10.01.2018. godine, donio je:

**PRAVILNIK  
O UNUTRAŠNJEM REDU UNUTAR PODRUČJA  
ZAŠTIĆENOG PEJZAŽA „KONJUH“**

**Član 1.**

**(Predmet)**

Ovim Pravilnikom uređuju se pitanja upravljanja prostorom i vrijednostima Zaštićenog pejzaža „Konjuh“, (u daljem tekstu: Zaštićeni pejzaž), u cilju zaštite, očuvanja, unapređenja, promocije i korištenja Zaštićenog pejzaža.

**Član 2.**

**(Upravljanje)**

(1) Zaštićenim pejzažom upravlja Javna ustanova Zaštićeni pejzaž „Konjuh“ (u daljnjem tekstu: Ustanova).

(2) Ustanova upravlja područjem Zaštićenog pejzaža na osnovu Plana upravljanja Zaštićenim pejzažom, Godišnjih planova i programa rada Ustanove, u skladu sa Zakonom o proglašenju dijela područja planine Konjuh Zaštićenim pejzažom Konjuh (u daljem tekstu: Zakon), Zakonom o osnivanju JU Zaštićeni pejzaž „Konjuh“ i ovim Pravilnikom.

(3) Ustanova obavlja djelatnost zaštite, očuvanja, unapređenja, održavanja, promocije i korištenja vrijednosti zaštićenog područja, na način kojim se osigurava neometano i uravnoteženo odvijanje prirodnih procesa na području Zaštićenog pejzaža.

(4) Ustanova nadzire i kontroliše provođenje uslova i mjera zaštite prirode, kao i način obavljanja dozvoljenih privrednih djelatnosti na području Zaštićenog pejzaža.

(5) Ustanova pri obavljanju djelatnosti upravljanja Zaštićenim pejzažom ostvaruje određene prihode, koji proizilaze iz djelatnosti, a na osnovu davanja usluga i prikupljanja naknada u cilju stvaranja uslova samoodrživog poslovanja i funkcionisanja Ustanove.

(6) Ustanova obavlja djelatnost kao javna služba u skladu sa zakonom.

**Član 3.**

**(Obaveza pridržavanja odredbi pravilnika)**

(1) Zaposlenici Ustanove, stanovnici na području Zaštićenog pejzaža, vlasnici i ovlaštenici prava na nekretninama, te pravna i fizička lica koja na području Zaštićenog pejzaža obavljaju dozvoljene djelatnosti i posjetitelji Zaštićenog pejzaža, dužni su se pridržavati odredaba ovog Pravilnika.

(2) Stanovnicima na području Zaštićenog pejzaža se smatraju lica koja imaju prebivalište, odnosno boravište u naseljima na području Zaštićenog pejzaža.

#### Član 4.

##### (Zaštita prirodnih procesa)

Radi zaštite i trajnog očuvanja prirodnih vrijednosti i održavanja stabilnosti prirodnih procesa u području Zaštićenog pejzaža, koji ima utvrđene biološke, ekološke, odgojno-obrazovne, estetske, kulturno-historijske i turističko-rekreacijske vrijednosti, na čitavom njegovom području pri obavljanju dozvoljenih djelatnosti, obavezno se primjenjuju mjere zaštite svih vrijednosti, koje su propisane zakonom ili se posebno propisuju u postupcima rješavanja podnešenih zahtjeva za odobravanje djelatnosti ili aktivnosti.

#### Član 5.

##### (Mjere zaštite)

Zaštita i očuvanje geoloških, hidrogeoloških, geomorfoloških i drugih pejzažnih vrijednosti provodi se na osnovu programa (stručnih projekata, studija i dr.) koje donosi Ustanova.

#### Član 6.

##### (Zaštita hidroloških vrijednosti)

Hidrološke vrijednosti i potencijali Zaštićenog pejzaža imaju poseban strateški i životni značaj za stanovnike lokalnih zajednica, zbog snabdijevanja pitkom vodom, te zahtijevaju posebnu brigu.

#### Član 7.

##### (Zaštita pitke vode)

Sve aktivnosti dozvoljenih djelatnosti koje izazovu bilo kakvo ugrožavanje količine i kvaliteta pitke vode ili kvarenja tehničkih elemenata sistema napajanja vodom lokalnih vodovoda (ekscena radnja), moraju se odmah obustaviti, a lice koje je prouzrokovalo ekscena mora odmah poduzeti mjere za otklanjanje štetnog uticaja na kvalitet pitke vode i dovođenja sistema vodovoda u tehničku ispravnost.

#### Član 8.

##### (Zaštita površinskih voda)

Sve aktivnosti dozvoljenih djelatnosti koje izazovu mućenje površinskih voda koje se ulivaju u vodene površine, moraju se odmah obustaviti, a lice koje je radovima prouzrokovalo ekscena mora odmah poduzeti mjere za otklanjanje uzroka mućenja vode.

#### Član 9.

##### (Korištenje hidroloških vrijednosti)

Pri odobravanju korištenja hidroloških vrijednosti područja Zaštićenog pejzaža, obavezno je ispunjavanje uslova minimuma količine vode u vodotoku ili drugom ekološkom sistemu, radi obezbjeđivanja uslova opstanka bioloških vrsta.

## Član 10.

### (Zaštita izgrađenih vrijednosti)

(1) Svi objekti izgrađeni u prostoru, bez obzira na njihovu namjenu predstavljaju izgrađene vrijednosti Zaštićenog pejzaža.

(2) Sve izgrađene vrijednosti Zaštićenog pejzaža uživaju zaštitu svojih vlasnika, koji su dužni provoditi sve potrebne mjere u tom smislu.

(3) Za izgrađene vrijednosti koje su u javnom vlasništvu i nemaju određeno lice za brigu o njihovoj zaštiti, zaštitu provodi Ustanova.

(4) Šumske i planinarske staze, kao i biciklističke i pješačke staze i puteve predstavljaju izgrađene vrijednosti područja, te se nemogu uništavati i privoditi drugoj namjeni bez saglasnosti Ustanove.

## Član 11.

### (Mjere zaštite izgrađenih vrijednosti)

Obaveza je svih obaveznika provođenja mjera zaštite nad izgrađenim vrijednostima Zaštićenog pejzaža, da propisuju i provode mjere zaštite izgrađenih vrijednosti u nivou koji se zahtijeva u pogledu njihovog stanja upotrebljivosti, izgleda ili drugog zahtijevanog ili normalnog stanja.

## Član 12.

### (Zaštita potencijala Zaštićenog pejzaža)

Ustanova ima obavezu zaštite svih identifikovanih i utvrđenih potencijala Zaštićenog pejzaža.

## Član 13.

### (Zaštita kulturno-historijskog naslijeđa)

Zaštitu i očuvanje kulturno-historijskog naslijeđa provodi Ustanova na osnovu posebnih stručnih planova i programa zaštite i očuvanja koje donosi Ustanova.

## Član 14.

### (Zaštita žive prirode)

Zaštita i očuvanje posebno zaštićenih autohtonih vrsta na području Zaštićenog pejzaža, provodi se na temelju stručnih dokumenata u skladu sa mjerama zaštite i uspostavljenog stalnog praćenja stanja populacije (monitoring).

## Član 15.

### (Uslovi zaštite prirode)

Uslovi zaštite prirode sastavni su dio planskih dokumenata dozvoljenih djelatnosti, šumskoprivredne osnove, lovnoprivredne osnove, vodoprivredne osnove i sl.

## Član 16.

### (Zaštita biljnog svijeta)

(1) Na području Zaštićenog pejzaža, obavljanje tradicionalne poljoprivrede je dozvoljeno.

(2) Ustanova organizira košenje trave na putevima radi protupožarne zaštite i održavanje izletničkih i rekreativnih površina i livada u državnom vlasništvu, na temelju Godišnjeg programa rada Ustanove.

#### Član 17.

##### (Zaštita životinjskog svijeta)

Zaštita životinjskog svijeta u području Zaštićenog pejzaža provodi se kroz program zaštite životinjskih vrsta, koji donosi Ustanova na temelju stručnih dokumenata o stanju životinjskih vrsta i njihovih staništa u Zaštićenom pejzažu.

#### Član 18.

##### (Protivpožarna zaštita)

(1) Protivpožarnu zaštitu na području Zaštićenog pejzaža organizuje i provodi Ustanova u saradnji sa profesionalnim i dobrovoljnim vatrogasnim društvima, nadležnim tijelima državne uprave i drugim pravnim licima koji obavljaju dozvoljenu privrednu djelatnost na području Zaštićenog pejzaža.

(2) U cilju uspostavljenja preventivnih protivpožarnih mjera obavezno je osigurati:

- a) stalnu protivpožarnu osmatračko-dojavnu službu;
- b) stalnu prohodnost puteva i staza kroz šume i šumsko zemljište;
- c) ispravnost uređaja za gašenje požara i njihovo stalno tehničko osavremenjavanje;

(3) Mjere protivpožarne zaštite na području Zaštićenog pejzaža dužne su primjenjivati i provoditi sva pravna i fizička lica koja rade, borave i kreću se na tom području.

(4) Ustanova neposredno nadzire primjenu propisa u vezi sa zaštitom od požara.

(5) U slučaju požara, gašenjem požara rukovodi ovlašteno lice određeno odlukom nadležnog tijela ili planom zaštite od požara.

#### Član 19.

##### (Obavljanje dozvoljenih djelatnosti)

(1) Na području Zaštićenog pejzaža dozvoljeno je obavljanje djelatnosti u skladu sa Zakonom o proglašenju dijela planine Konjuh Zaštićenim pejzažom "Konjuh".

(2) Pravna i fizička lica koja obavljaju dozvoljene djelatnosti na području Zaštićenog pejzaža, dužne su postupati u skladu sa zakonom, provedbenim propisima donesenim na temelju zakona i ovim Pravilnikom.

(3) Za obavljanje privrednih djelatnosti na području Zaštićenog pejzaža, potrebna je dozvola Ustanove, ako zakonom nije drugačije određeno.

(4) Ako Ustanova nudi ustupanje obavljanja određene djelatnosti drugom pravnom ili fizičkom licu, provodi se javni poziv na način propisan zakonom i drugim propisom.

#### Član 20.

##### (Eksploatacija mineralnih sirovina)

(1) Eksploatacija mineralnih sirovina dozvoljena je isključivo unutar odobrenih eksploatacijskih polja.

(2) Dozvoljena je eksploatacija mineralnih sirovina u svrhu sanacije postojećih napuštenih, nesaniranih otkopa, erozija i klizišta na području Zaštićenog pejzaža, opasnih za ljude i životinje, uz ispunjenje uslova zaštite prirode koje utvrđuje Ustanova.

#### Član 21.

(Pravna lica koja obavljaju privrednu/obrtničku djelatnost)

S pravnim licima koja obavljaju privrednu/obrtničku djelatnost na području Zaštićenog pejzaža, Ustanova sklapa ugovor kojim se uređuju međusobni odnosi u skladu sa uvjetima zaštite prirode koje utvrđuje Ustanova.

#### Član 22.

(Šumarstvo)

(1) Pitanja gospodarenja šumama u području Zaštićenog pejzaža definisana su Zakonom po zonama zaštite.

(2) Korištenje ostalih šumskih proizvoda po zonama zaštite definisano je Zakonom.

#### Član 23.

(Šumske aktivnosti)

Sve šumske aktivnosti u svim zonama zaštite od projektovanja do mjera izvršenja i realizacije moraju da budu usklađene sa uslovima zaštite prirode i uslovima zaštite konkretnih vrijednosti Zaštićenog pejzaža na lokalitetima gdje se radovi izvode.

#### Član 24.

(Sanitarna sječa)

Sječe stabala u zoni A zaštite, koje se provode iz sanitarnih razloga i dozvoljene su po Zakonu, ne smiju imati karakter industrijskih sječa po obimu ili tehnološkim rješenjima eksploatacije drvnih masa takvih sječa (redovne sječe u šumarskoj praksi).

#### Član 25.

(Uslovi provođenja sanitarnih sječa)

Uslovi provođenja sanitarnih sječa i iskorištavanja drvnih masa takvih sječa u zonama A zaštite, kako bi se zaštitila ravnoteža prirodnih procesa i osigurala zaštita vrijednosti, moraju da ispunjavaju i obezbjeđuju slijedeće:

- Obim sanitarnih sječa u A zonama zaštite ne smije biti veći od 100 m<sup>3</sup> za jedan šumski odjel u jednoj godini.
- Tehnološka rješenja moraju biti prilagođena uslovima i ograničenjima zona zaštite u cilju ispunjenja uslova zaštite i održavanja ravnoteže prirodnih procesa.
- Dinamika izvođenja svih radova na iskorištavanju drvnih masa sanitarnih sječa u jednom odjelu mora da bude završena u roku od najviše 30 dana.
- Vrijeme (kalendar) izvođenja radova na iskorištavanju drvenih masa sanitarnih sječa mora da bude prilagođeno uslovima zaštite (vrijeme kad je rizik za pojavu ekscesa najmanji).

- Manipulacija sa proizvodima dobivenim iskorištavanjem drvnih masa sanitarnih sječa mora da bude efikasna i što brža, bez deponovanja i zadržavanja na šumskim stovarištima.
- Maksimalno zadržavanje proizvoda na šumskim međustovarištima je 7 dana od dana sječe.

#### Član 26.

##### (Lov i uzgoj divljači)

(1) Dijelovi Zaštićenog pejzaža koji se nalaze u granicama A zone zaštite, nelovna su prirodna područja, nelovna površina.

(2) Dijelovi Zaštićenog pejzaža koji se nalaze u granicama B i C zone zaštite, lovna su površina ako se nalaze u području i pripadaju uspostavljenom lovištu u skladu sa zakonom i planovima donesenim na osnovu zakona.

(3) Na pitanja iz područja lova koja nisu utvrđena ovim Pravilnikom primjenjuju se propisi iz Zakona o lovstvu.

#### Član 27.

##### (Zaštita divljači na nelovnim područjima)

Na nelovnim područjima u Zaštićenom pejzažu, zaštita divljači se provodi kroz Program zaštite životinjskih vrsta, koji donosi Ustanova na temelju stručnih dokumenata o stanju životinjskih vrsta u Zaštićenom pejzažu.

#### Član 28.

##### (Zaštita divljači na lovnim područjima)

(1) Na lovnim površinama Zaštićenog pejzaža, koje su uključene u uspostavljena lovišta, lov i uzgoj divljači dopušten je u skladu sa zakonima.

(2) Lov se provodi u skladu s lovnoprivrednim osnovama.

(3) Pravna lica (subjekti) koja obavljaju lov na području Zaštićenog pejzaža obavezna su Ustanovi dostaviti:

- kalendar lova (godišnje),
- podatke o broju i vrsti odstrijeljene divljači (godišnje).

#### Član 29.

##### (Poljoprivredna proizvodnja)

(1) Na području Zaštićenog pejzaža dopuštena je, u skladu sa Zakonom, poljoprivredna proizvodnja, obnavljanje poljoprivrednih površina, izgradnja i uspostava farmi za uzgoj domaćih i divljih životinja, kao i ostalih poljoprivrednih i stočarskih djelatnosti, uz ispunjenje uslova zaštite prirode koje utvrđuje Ustanova.

(2) Na području Zaštićenog pejzaža u zoni A, nije dopuštena ispaša i kretanje stoke

(3) Na području Zaštićenog pejzaža u zonama B i C, dopuštena je ispaša, kao i kretanje stoke.

(4) Ispaša i kretanje stoke dopuštena je uz nadzor pastira.

(5) Zabranjena je ispaša stoke na planinskim rudinama i posebno zaštićenim objektima prirode, kao i na područjima gdje to ne dozvoljavaju šumskoprivredne i lovnoprivredne osnove.

- (6) Na području Zaštićenog pejzaža zabranjeno je kretanje stoke putevima i stazama.
- (7) Nije dopušteno bez nadzora kretanje domaćih životinja koje mogu nanijeti štetu ili ozljede posjetiteljima Zaštićenog pejzaža.
- (8) Na području Zaštićenog pejzaža dozvoljeno je držanje pčela uz pojedinačno dopuštenje Ustanove, donešeno po zahtjevu i ispunjenim uslovima.

#### Član 30.

(Šteta koju nanese domaće životinje)

Štetu koju nanese domaće životinje u području Zaštićenog pejzaža, dužan je otkloniti ili nadoknaditi vlasnik tih životinja.

#### Član 31.

(Posjećivanje i razgledanje)

- (1) Zaštićeni pejzaž kao područje s naglašenim prirodnim, naučnim, kulturnim, odgojno-obrazovnim i turističko-rekreativnim vrijednostima namijenjen je posjećivanju, razgledanju i rekreaciji.
- (2) Ustanova donosi program (model) posjećivanja razgledanja i rekreacije, kojim se pobliže uređuju dozvoljeni načini i mjesta posjećivanja, razgledanje i rekreacije, te istovremeni broj posjetitelja, a u skladu sa Pravilnikom o uslovima pristupanja zaštićenim područjima F BiH( „Sl.novine F BiH“ br.69/06).

#### Član 32.

(Naknade)

- (1) U prostor Zaštićenog pejzaža ili u njegove dijelove (objekte posebnih vrijednosti) posjetitelji mogu ući na mjestima koja su određena kao ulazi u Zaštićeni pejzaž.
- (2) Za ulaz u Zaštićeni pejzaž plaća se naknada po posebnom propisu koji donosi Ustanova.
- (3) Za ostvarivanje rekreacijskih aktivnosti korištenjem izletišta, puteva, staza i drugih objekata Zaštićenog pejzaža, kao i za vozilo, odnosno drugo prometno sredstvo (motor, bicikl) koje se koristi u obilasku Zaštićenog pejzaža može se propisati plaćanje ekološke rente-takse, odnosno naknade.
- (4) Plaćanje naknade može se propisati i dodatno za posjećivanje i razgledanje pojedinih lokaliteta (prirodnih vrijednosti) unutar zona zaštite Zaštićenog pejzaža.
- (5) Visinu naknade za ulaz u Zaštićeni pejzaž ili u njegove pojedine dijelove, utvrđuje Upravni odbor Ustanove uz saglasnost Ministarstva (cjenovnik usluga).
- (6) Za vrijeme boravka u Zaštićenom pejzažu posjetitelji su dužni sačuvati ulaznicu.

#### Član 33.

(Kretanje)

- (1) Unutar granica Zaštićenog pejzaža dozvoljeno je kretanje posjetiteljima samo na područjima i stazama koje su označene i namijenjene razgledavanju i posjećivanju.
- (2) Pravce kretanja i mjesta koja se mogu posjećivati utvrđuje Ustanova.
- (3) Ustanova je dužna osigurati da pravci kretanja i mjesta koja se mogu posjećivati budu odgovarajuće označeni i sigurni za posjetitelje.

#### Član 34.

(Kretanje uz odobrenje Ustanove)

(1) Kretanje posjetitelja izvan područja i staza iz člana 33. ovog Pravilnika dozvoljeno je uz odobrenje Ustanove uz prethodnu najavu sa definisanom maršutom kretanja.

(2) Kretanje planinarskih grupa može se regulisati posebnim ugovorom između planinarskih društava i Ustanove.

#### Član 35.

(Povlaštena lica)

Odredbe člana 32. do 34. ovog Pravilnika ne odnose se na službena i ovlaštena lica, na stanovnike na području Zaštićenog pejzaža, vlasnike i ovlaštenike prava na nekretninama na području Zaštićenog pejzaža, na zaposlenike pravnih lica koje obavljaju dozvoljene aktivnosti, na lovce koji posjeduju odobrenje za lov izdano od strane korisnika lovišta, te na druga lica koja posjeduju odobrenje za ulazak i kretanje od strane Ustanove.

#### Član 36.

(Kretanje pasa)

(1) Psi se moraju držati vezani ili u ograđenom prostoru, te voditi na uzici.

(2) Lovački psi smiju se kretati Zaštićenim pejzažom u skladu sa propisom koji uređuje pitanja lovnog reda korisnika lovišta.

#### Član 37.

(Saobraćaj)

(1) Na cijelom području Zaštićenog pejzaža slobodan saobraćaj je ograničen i zasebno uređen.

(2) Kretanje vozila privrednih subjekata koji obavljaju dozvoljene djelatnosti u Zaštićenom pejzažu dozvoljeno je i odvija se u skladu sa odredbama ovog Pravilnika.

(3) Individualna posjeta Zaštićenom pejzažu motornim vozilima radi razgledavanja, obavljanja rekreativnih aktivnosti, kupovine šumskih proizvoda, pčelarenja ili neke druge individualne dozvoljene aktivnosti u skladu sa ovim Pravilnikom dozvoljen je uz odobrenja Ustanove i plaćanje ekološke naknade po Cjenovniku.

(4) Fizička lica, vlasnici nekretnina u području Pejzaža, kao i članovi njihovih užih porodica, imaju pravo na dolazak na posjed bez plaćanja naknada.

(5) Ustanova može organizirati ili povjeriti organiziranje prijevoza posjetitelja radi razgledanja Zaštićenog pejzaža drugoj pravnoj ili fizičkoj osobi.

(6) O obavljanju djelatnosti iz stava (5) ovog člana Ustanova izdaje odobrenje.

#### Član 38.

(Regulisanje saobraćaja)

(1) Brzina kretanja vozila na motorni pogon na putevima u Zaštićenom pejzažu, ograničena je:

- za autobuse i putnička vozila do 30 km/h;
- za teretna i kombi vozila do 30 km/h;



– za traktore i radne mašine do 20 km/h.

(2) Ograničenje iz stava (1) ovog člana ne odnose se na kretanje vozila pravnih lica s javnim ovlastima u obavljanju poslova iz njihovog djelokruga, kad je to nužno u obavljanju njihove djelatnosti.

(3) Na ulazu u Zaštićeni pejzaž i na saobraćajnicama unutar Zaštićenog pejzaža Ustanova uređuje saobraćajni red postavljanjem saobraćajnih znakova i drugih objekata kojim se reguliše saobraćaj, a na osnovu ovog Pravilnika ili drugih propisa ili akata koje donosi Ustanova.

#### Član 39.

##### (Parkiranje)

(1) Parkiranje vozila na području Zaštićenog pejzaža dozvoljeno je na predviđenim i označenim mjestima.

(2) Mjesta za parkiranje određuje Ustanova.

(3) Ustanova je dužna osigurati da mjesta za parkiranje budu odgovarajuće označena.

(4) Na pojedinim područjima Zaštićenog pejzaža, istovremeno može biti maksimalni broj vozila koliko ima uređenih i organiziranih parkiranih mjesta.

#### Član 40.

##### (Saobraćanje sa dozvolom Ustanove)

(1) Fizičke i pravne osobe koje imaju trajnu potrebu za saobraćanjem po cestama na kojima saobraćaj nije dozvoljen, moraju za to imati dozvolu Ustanove.

(2) Vlasnicima i ovlaštenicima prava na nekretninama na području Zaštićenog pejzaža, Ustanova izdaje godišnju iskaznicu za nesmetano kretanje do nekretnina.

(3) Za kretanje na ostalom području Zaštićenog pejzaža vlasnici i ovlaštenici prava na nekretninama dužni su pribaviti posebno odobrenje od Ustanove.

#### Član 41.

##### (Korištenje bicikla)

(1) Posjetitelji Zaštićenog pejzaža kao prijevozno sredstvo mogu koristiti i bicikl te druga prijevozna sredstva uz uslove koje odredi Ustanova.

(2) Korištenje bicikla i drugih prevoznih sredstava, obavljat će se samo po za to određenim stazama i putevima.

#### Član 42.

##### (Boravak, noćenje, kampiranje odnosno logorovanje)

Mjesta za boravak, noćenje, kampiranje odnosno logorovanje određuje Ustanova.

#### Član 43.

##### (Rekreativne aktivnosti)

(1) Zaštićeni pejzaž kao područje s naglašenim rekreativnim vrijednostima namijenjeno je i rekreativnim aktivnostima.

(2) Rekreativne aktivnosti dozvoljene su na za to unaprijed predviđenim i označenim mjestima, koje izrađuje i održava Ustanova u skladu sa uslovima zaštite prirode.

(3) Rekreativni objekti i rekreativne površine su u vlasništvu Ustanove.

(4) Ustanova može organizirati razne rekreativne aktivnosti, a posebno fotosafari, planinarenje, penjanje, speleologiju i druge rekreativne aktivnosti.

(5) Organizirane rekreativne aktivnosti provodi Ustanova.

(6) Organiziranje rekreativnih aktivnosti Ustanova može povjeriti drugim pravnim i fizičkim licima uz uslove propisane ovim Pravilnikom.

#### Član 44.

##### (Uslovi za obavljanje rekreativnih aktivnosti)

(1) Lica koja obavljaju rekreativne aktivnosti dužne su svakodnevno, prilikom ulaska u Zaštićeni pejzaž, prijaviti mjesto i vrijeme namjeravane rekreativne aktivnosti, te se pridržavati propisanih pravila u obavljanju tih aktivnosti.

(2) Ustanova je dužna obezbijediti službu spašavanja za rekreativne aktivnosti ili to povjeriti drugim pravnim ili fizičkim licima.

(3) Ustanova može, ako za to postoje opravdani razlozi, posebno u svezi sigurnosti posjetitelja, zabraniti privremeno ili trajno, na određenom dijelu ili na čitavom području obavljanje rekreativnih aktivnosti.

#### Član 45.

##### (Ulazak u speleološke objekte)

(1) Penjanje, spuštanje u jame i druge speleološke objekte provodi se neposredno pod nadzorom Ustanove.

(2) Način obavljanja rekreativnih aktivnosti iz stava (1) ovog člana bliže se uređuje odlukom Ustanove.

#### Član 46.

##### (Škole za rekreativne aktivnosti)

Ustanova može organizirati škole za rekreativne aktivnosti ili to povjeriti drugom pravnom ili fizičkom licu.

#### Član 47.

##### (Istraživanje)

(1) Zaštićeni pejzaž, kao područje višestrukih prirodnih i naučnih vrijednosti, namijenjeno je i naučnom istraživanju.

(2) Za istraživanje biljnih i životinjskih vrsta, te obavljanje geoloških, geomorfoloških, hidrogeoloških i drugih istraživanja potrebno je dobiti dozvolu Ustanove.

(3) U dozvoli iz stava (3) ovog člana, utvrđuju se i uslovi zaštite prirode.

(4) O dozvoli za naučno istraživanje izvještavaju se nadležna ministarstva .

(5) Pravna i fizička lica koja su obavila istraživanje dužna su u roku od 60 dana od dana završetka istraživanja dostaviti izvještaj o istraživanju i rezultatima istraživanja Ustanovi.

#### Član 48.

##### (Prekid istraživanja)

Ustanova je dužna prekinuti istraživačke aktivnosti u slučaju da se istraživači ne pridržavaju uslova utvrđenih u dozvoli o načinu i vremenu istraživanja, te ako istraživači svojom djelatnošću i radnjama nanesu štetu vrijednostima Zaštićenog pejzaža.

#### Član 49.

##### (Eksces)

(1) Stanje stvari koje se javi kao posljedica nepridržavanja i nepoduzimanja propisanih mjera zaštite i ima karakter stanja poremećene ravnoteže procesa sa štetnim posljedicama na vrijednosti Zaštićenog pejzaža, kojeg izazovu direktnim ili indirektnim radnjama subjekti koji obavljaju djelatnosti u prostoru, posjetioci prostora, Ustanova ili neko drugo lice ili neka prirodna pojava, naziva se neželjenom (štetnom) situacijom ili ekscesom.

(2) Eksces može nastati i kao posljedica drugih okolnosti u uslovima kada su preduzete sve potrebne mjere za zaštitu vrijednosti Zaštićenog pejzaža, koje se nisu mogle pretpostaviti i eksces se javio neočekivano.

#### Član 50.

##### (Postupanje u slučaju ekscesa)

(1) Svako lice, koje pri obavljanju dozvoljenih djelatnosti u Zaštićenom pejzažu, svojim aktivnostima i radnjama prouzrokuje eksces, dužno je odmah, bez odlaganja, obustaviti radnju ili aktivnost kojom je prouzrokovan eksces.

(2) Svako lice, koje pri obavljanju dozvoljenih djelatnosti u Zaštićenom pejzažu, svojim aktivnostima i radnjama prouzrokuje eksces, dužno je odmah, bez odlaganja, obavijestiti Ustanovu o izazvanom ekscesu usmeno odmah i pismeno u formi izvještaja najkasnije 24 sata od pojave ekscesa, u kojem će detaljnije opisati događaj ekscesa.

(3) Svako lice, koje pri obavljanju dozvoljenih djelatnosti u Zaštićenom pejzažu, svojim aktivnostima i radnjama prouzrokuje eksces, dužno je odmah preduzeti sve potrebne radnje za saniranje izazvanih štetnih posljedica na vrijednosti Zaštićenog pejzaža i nadoknaditi prouzrokovanu štetu vlasniku ili drugom ovlašteniku za dio koji nije moguće sanirati, što se utvrđuje dogovorom dviju strana ili uz posredovanje trećeg lica.

## Član 51.

### (Obilježavanje)

(1) Obilježavanje na području Zaštićenog pejzaža, obavlja se u skladu sa Elaboratom obilježavanja, kojeg donosi Ustanova.

(2) Jezično obilježavanje obvezno je na bosanskom i engleskom jeziku.

## Član 52.

### (Obilježavanje granica)

(1) Granice Zaštićenog pejzaža obilježavaju se informativnim tablama s natpisom: Zaštićeni pejzaž "Konjuh", sa oznakom zone zaštite, i to na mjestima gdje saobraćajnice, putevi i staze ulaze na područje Zaštićenog pejzaža. Vrste i izgled graničnih informativnih tabli propisuje Ustanova.

(2) Na šumskim i drugim predjelima granica se obilježava oznakama na stablima koje su utvrđene u Pravilniku o obilježavanju vanjskih i unutarnjih granica Zaštićenog pejzaža.

## Član 53.

### (Obilježavanje puteva i staza)

(1) Putevi i staze obilježavaju se oznakama koje imaju obilježje planinarske oznake sa oznakom vrste i namjene staze.

(2) Na području Zaštićenog pejzaža, Ustanova može postavljati putokaze, informativne table s oznakama vrhova, vidikovaca, mjesta, planinarskih i drugih objekata, lovišta, planinarskih staza, speleoloških objekata, botaničkih i drugih zaštićenih objekata prirode, kao i informativne table s kartom ili edukativnim tekstom, informativne table sa znakovima zabrane ili dozvole pojedinih radnji, te saobraćajne oznake.

(3) Informativne table i oznake, osim standardiziranih oznaka (saobraćajni znakovi) trebaju biti estetski oblikovane i izrađene od prirodnog materijala (kamen, drvo).

## Član 54.

### (Nadzor)

Nadzor nad provođenjem ovog Pravilnika obavlja Ustanova, te Ministarstvo u okviru svoje nadležnosti.

## Član 55.

### (Nadzor u Zaštićenom pejzažu)

Neposredni nadzor i zaštitu u Zaštićenom pejzažu obavlja Javna ustanova Zaštićeni pejzaž "Konjuh" Banovići, kroz službu zaštite i nadzora, koju čine odgovorno lice za nadzor-glavni nadzornik i nadzornici u skladu sa Zakonom, Zakonom o zaštiti prirode i ovim Pravilnikom.

## Član 56.

### (Ovlasti i dužnosti odgovorne osobe za nadzora - glavnog nadzornika)

Za organizaciju i vođenje poslova neposrednog nadzora, direktor Ustanove u skladu sa organizacijom rada imenuje ili ovlašćuje odgovornu osobu za nadzor koja je dužana da:

a) organizira, kontrolira i nadgleda rad nadzornika, sastav smjena, satnicu radnog vremena i organizaciju noćnih kontrola,

- b) kompletira dostavljene zapisnike o utvrđenom stanju na licu mjesta s priložima (fotodokumentacija, skice, iskazi svjedoka i dr.) u cilju pokretanja inspeksijskog, prekršajnog, odnosno sudskog postupka, te iste pokreće,
- c) priprema izvještaje i planove rada u oblasti nadzora,
- d) vodi evidenciju i brigu o privremeno oduzetim predmetima.
- f) organizira i provodi integralnu zaštitu prostora i vrijednosti Zaštićenog pejzaža,

#### Član 57.

(Ovlasti nadzornika)

Nadzornik je ovlašten da:

- a) vrši neposredan nadzor u Zaštićenom pejzažu,
- b) kontinuirano obavještava direktora Ustanove o dešavanjima u Zaštićenom pejzažu,
- c) upozorava posjetioca i korisnike Zaštićenog pejzaža na neadekvatno ponašanje,
- d) zatraži od posjetioca ličnu kartu ili drugu ispravu na osnovu koje se može utvrditi identitet posjetioca, ulaznicu, dozvolu, odobrenje, suglasnost ili neki drugi dokument kojim se dokazuje status posjetioca ili korisnika i samim tim neko od prava koje je u vezi s aktivnošću/aktivnostima koje obavlja,
- e) zatraži na uvid neophodna odobrenja za obavljanje dozvoljenih djelatnosti u Zaštićenom pejzažu,
- f) sačini zapisnik i dostavi direktoru Ustanove s popratnom dokumentacijom (fotodokumentacija, skice, iskazi svjedoka i dr.) u cilju provođenja inspeksijskog, prekršajnog, odnosno sudskog postupka pred nadležnim organima,
- g) ukoliko se ukaže potreba da zaustavi prijevozna sredstva, osim vozila hitne pomoći, vozila policije i vatrogasnih vozila, pregleda prijevozna sredstva, teret i prateću dokumentaciju, pri čemu odmah obavještava direktora Ustanove koji će obavijestiti nadležnog inspektora ili policiju,
- h) zabrani na licu mjesta obavljanje rekreacijskih i drugih aktivnosti koje se organiziraju i provode suprotno propisima,
- i) zabrani na licu mjesta sječu šume, lov, ribolov i druge aktivnosti koje se obavljaju suprotno propisima i bez validnih odobrenja,
- j) zabrani na licu mjesta kopanje, odnosno odvoženje kamena, šljunka, pijeska i zemlje, koje se obavlja suprotno propisima.
- k) privremeno oduzme nezakonito stečeni dio živog i neživog svijeta, kao i sredstva kojima je izvršeno protupravno prisvajanje,
- l) zabrani prodaju robe koja se prodaje bez dopuštenja Ustanove i van mjesta predviđenih za tu djelatnost,
- m) privremeno oduzme oružje koje nosi osoba bez odobrenja za držanje i nošenje oružja, te ako je osoba zatečena u krivolovu.

#### Član 58.

(Dužnosti nadzornika)

U toku obavljanja neposrednog nadzora nadzornik je dužan da:

- a) prati stanje flore i faune, geomorfoloških, hidroloških i drugih prirodnih i kulturnohistorijskih vrijednosti u Zaštićenom pejzažu,
- b) vodi službenu knjigu za nadzornike u koju svakodnevno upisuje svoja zapažanja i izvršene zadatke, te obavještava direktora Ustanove,
- c) daje informacije posjetiocima, pomaže prilikom obilaska i razgledanja zaštićenog područja,
- d) nadgleda, prati i kontrolira dozvoljene djelatnosti i radnje posjetioca i vlasnika nekretnina u zaštićenom području, te drugih pravnih i fizičkih lica,

- e) pregleda ulov i sredstva za ribolov ili lov radi utvrđivanja da li su ribolov ili lov dozvoljeni ili obavljani u skladu s internim aktima Ustanove,
- f) spriječi neovlaštenom licu ulazak u Zaštićeni pejzaž i objekte,
- g) pruža pomoć i surađuje s lokalnim stanovništvom i drugim nosiocima stvarnih prava na nekretninama u Zaštićenom pejzažu u cilju zaštite prirodnih i drugih vrijednosti,
- h) nadzire i pomaže organizatore i učesnike edukacijskih aktivnosti, naučnih i drugih istraživanja,
- i) sačinjava zapisnike i dostavlja ih direktoru Ustanove na daljnji postupak,
- j) surađuje s nadležnom jedinicom policijske uprave, uprave za šumarstvo i vatrogasnim jedinicama, te po potrebi traži od istih asistencije i
- k) obavlja ostale poslove po nalogu direktora Ustanove.

#### Član 59.

(Poslovi fizičke zaštite ljudi i imovine)

(1) Poslove iz člana 58. tačke d), e) i f) ovog Pravilnika nadzornik vrši u skladu s odredbama Pravilnika o sadržaju, obvezama i načina vršenja radnji koje poduzima čuvar, korištenja vatrenog oružja i fizičke sile tokom obavljanja poslova fizičke zaštite ljudi i imovine ("Službene novine Federacije BiH", broj 92/14).

(2) Za obavljanje poslova iz člana 58. tačke d), e) i f) ovog Pravilnika, nadzornik je obavezan posjedovati certifikat za obavljanje poslova fizičke zaštite utvrđen Zakonom o agencijama i unutrašnjim službama za zaštitu ljudi i imovine ("Službene novine Federacije BiH", br. 78/08 i 67/13).

#### Član 60.

(Odgovornost nadzornika)

U vršenju dužnosti iz člana 58. ovog Pravilnika nadzornik odgovara direktoru Ustanove ako:

- a) ne poduzme ili propusti poduzeti mjere ili radnje koje je dužan poduzeti u skladu sa Zakonom, Zakonom o zaštiti prirode, ovim Pravilnikom i drugim zakonskim propisima,
- b) prekorači ovlaštenja koja su utvrđena zakonskim i drugim propisima koji se odnose na zaštitu prirode, zaštitu ljudi i imovine i ovim Pravilnikom,
- c) ako ne sačini zapisnik o radnjama i nepravilnostima koje je uočio tokom provođenja neposrednog nadzora u Zaštićenom pejzažu, te ne obavijesti direktora Ustanove, a po potrebi i drugi nadležni organ.

#### Član 61.

(Privremeno oduzeta sredstva, alat i oprema)

(1) Nadzornik može privremeno oduzeti sredstva, alat, opremu i pribor od lica koje zatekne u Zaštićenom pejzažu, ukoliko utvrdi da se lice neovlašteno nalazi u Zaštićenom pejzažu ili ukoliko ocijeni da to lice s tim sredstvima i opremom može nanijeti štetu Zaštićenom pejzažu.

(2) O privremenom oduzimanju predmeta nadzornik izdaje potvrdu s točno označenim oduzetim predmetima po vrsti, količini i eventualno serijskom broju.

(3) Ustanova je dužna osigurati uvjete za održavanje i čuvanje privremeno oduzetih sredstava.

#### Član 62.

(Službena uniforma i službena legitimacija)

(1) Nadzornik poslove i radne zadatke obavlja u službenoj uniformi.

(2) Nadzornik svoje službeno svojstvo, identitet i ovlaštenja dokazuju službenom legitimacijom.

(3) Izgled službene uniforme, izgled službene legitimacije, sadržaj i način nošenja propisuje Ustanova.

Član 63.

(Nošenje oružja)

(1) Nadzornik za vrijeme obavljanja poslova zaštite ljudi i imovine može posjedovati oružje u skladu s Pravilnikom o vatrenom oružju za obavljanje poslova fizičke zaštite ljudi i imovine ("Službene novine Federacije BiH", broj 92/14).

(2) Vatreno oružje u Zaštićenom pejzažu mogu nositi i koristiti u skladu sa zakonom službene osobe kada obavljaju službu i lovci koji obavljaju dozvoljeni lov u lovištima unutar Zaštićenog pejzaža.

Član 64.

(Prelazne i završne odredbe)

(1) Ovlaštena tijela Ustanove donijet će akte propisane ovim Pravilnikom u roku 90 dana od dana stupanja na snagu ovog Pravilnika.

(2) Pravna i fizička lica koja na području Zaštićenog pejzaža obavljaju privrednu ili drugu dozvoljenu djelatnost, te vlasnici i ovlaštenici prava na nekretninama u Zaštićenom pejzažu, dužni su svoju djelatnost i rad uskladiti s odredbama ovog Pravilnika u roku od 90 dana od dana njegova stupanja na snagu.

Član 65.

(Stupanje na snagu)

Ovaj Pravilnik stupa na snagu danom donošenja od strane Upravnog odbora Ustanove.

Bosna i Hercegovina  
Federacija Bosne i Hercegovine  
Tuzlanski kanton  
Javna ustanova Zaštićeni pejzaž „Konjuh“

PREDSJEDNIK UO USTANOVE

Bećarević Senad, dipl.ing.

Broj: \_\_\_\_\_  
Banovići, \_\_\_\_\_

\_\_\_\_\_